

Ein schon gebet von sant michael

In heiliger engel gottes der du mein huter bist von
der ewigen krafft richt mich auß vnd beschirm
mich. Ich bitte dich du engelischer geyst dem ich ar-
mer vnwürdiger entpfolhen bin zu vorsehen vnd
der du mich behutest on vnderlaß vor alles anlauffe
des teufels vñ zu allen stundē schlaffend vñ wachēd
so hab mich nun yn deiner hut vnd pflege vñ folge
mir wo ich gehe vnd stehe vnd vortreib von mir
durch dein krafft alle beferunge vnd was ich vmb
got nicht vordinet habe das erwirb mir du heyliger
engel mit deinem aller barmhertzigisten richter vnd
wen du wirst schawen das ich bin irre gegangen yn
vntugendenn so fleyß du dich das du mich widder
bringest auff den weg der gerechtigkeit das ich gehe
zu meinem schopffer das ich vmb mein werck vnd
vmb dein huth mit sampt der heyligen muter gottes
vnd allen heiligen ewiglichen auch frewe Amen: